


BIBLIOTEKA


Zakl. Nar. im. Ossolińskich


XVII

2045









V I T A  
EXIMII VIRI  
IOANNIS CANTII

S. TH. DOCTORIS, & IN CRA-  
COVIENSI ACADEMIA  
PROFESSORIS,

*Tum ex M. S. Collegij Maioris, & Ecclesie S.  
ANNÆ, (in qua Sacrum eius depositum quie-  
scit,) in Archivo eiusdem asseruato: tum  
ex Matthia de Miechouia rerum Polonica-  
rum Historiographo; & ex alijs recentioribus  
fide dignis, qui gesta vite eius celebrarunt:  
pro beatificatione illius consequenda,*

COLLECTA & DESCRIPTA.

*Studio & opera*

M. ADAMI OPATOVII S. TH.  
Professoris, ad S. Anne Decani.

CRACOVIÆ, Ex Officina Francisci Cæsarij. 1628.




## Approbatio.

Ego SEBASTIANVS NV CERINVS  
S. Th. D. Ecclesie Cathedralis Cracouiensis Ordina-  
narius Concionator, Librorum in lucem typis pro-  
deuntium in Diœcesi Cracouiensi Censor, fidem  
facio, quod hanc Vitæ D. Ioannis Cantij descri-  
ptionem, ab Adm. R. D. Adamo Opatouio S.  
Th. D. ac in Academia Cracouiensi eiusdem Pro-  
fessore, Ecclesie S. Anne Decano, publico vsui col-  
lectam, vidi & legi: & quia fidei Sanctæ, probisq;  
moribus consonam, præclarisq; sanctimonie Chri-  
stianæ exemplis, & candoris Academici argumen-  
tis refertam reperi: idcirco vt prelo publici iuris  
fieret, permisi. Crac. 25. Martij. 1628.



XVII-2045-III



## P R Æ F A T I O.



Benedicimus Deum cœli & terræ, Patrem & Filium, vnâ cum S. Spiritu, Deum vnum in Trinitate, eundemq; Trinum in vnitatem, ineffabilem & gloriosum: & coram omnibus viuentibus confitemur ei, quia fecit nobiscum misericordiam suam, eligens in Septemtrionis Regni Poloniæ Cracouiensi Gymnasio, dilectum seruum IOANNEM CANTIVM, & in eo innumera gratiarum dona, & admiranda virtutum opera manifestans. Quæ quidem cum breui ac simplici stylo, vnâ cū vitæ eius sanctitate, de auxilio gratiæ Dei confidentes, comprehendere nitimur, opera Dei reuelare, & confiteri, quod honorificum est, pro nostra tenuitate intendimus.



## Eo ordine, qui sequitur.

1. De Patria, Parentibus, & educatione domestica V. Ioannis Cantij.
2. De preclara eiusdem iuuentute, in studiis Academicis exacta.
3. De studio Humilitatis, cum sui despicienti.
4. De admirabili simplicitate.
5. De pietate in Deum, seu cultus diuini seruire.
6. De patientia & tolerantia aduersitatum voluntarie susceptarum.
7. De mortificatione corporis.
8. De operibus misericordie.
9. De dono Prophetie.
10. De conuersatione cum viris Beatis, qui illius seculo, vita sanctitate claruerunt.
11. Catalogus brevis laborum, quos in statione Academica sustinuit.
12. De transitu ex hac vita ad immortalem.
13. De quibusdam miraculis, que mortem eius subsequuta.



## C A P V T I.

*De Patria , Parentibus , & educatione illius  
domestica.*

**E**Ximius IOANNES CANTIVS,  
natale solum sortitus est oppidum Canty,  
Latinè sonat angulos, quòd duos præaltos Car-  
pati montes versùs meridiem aspiciat, qui ex-  
porrectis in longum laterum extremitatibus,  
& proximè coeuntibus, angulum videntur  
efformare: vicinum Silesiæ locum occupa-  
uit, fines ditionis Polonæ distterminans, propè  
Osuecimum, in spatio octo milliarium a Cra-  
couia distans. In hoc oppido, Honestis atque  
inprimis Catholicis parentibus natus est, in  
festo Sancti Ioannis Baptistæ , Anno Salutis,  
M. CCC. XCVII. patre Stanislao, viro Con-  
sulari, & pietatis insigni cultore: qui susce-  
ptum puerum, vnà cum coniugè sua Anna,  
muliere pudicitiae & diuini cultus amantissi-  
ma, cognitione Dei, & primis fidei Catholicæ

rudimentis imbucere, & ad omnem probitatem, teneram eius mentem conformare studebat. In omnibus ille parere consuevit, monita parentū amplecti, ludos pueriles aspernari, serium quiddā & graue vultu & factis præferens, cælestis gratiæ iam inde in corde suo inhabitantis, præclara documenta præbebat.

## C A P V T II.

*De præclara eius iuuentute, in studiis Academicis peracta.*

**E**Xactis pueritiæ annis, sub parentum disciplina, & literarum primordijs degustatis, voluntate eorundem, adit celeberrimū pietatis ac omnium scientiarum domicilium, quod tunc D. Iagellonis munificentia instauratum, studiosorum frequentia, assiduitate, & summa Professorum in docendo contentione florebat. His sub magistris, mens illa pia, studio cognitionis ardens, & iam secreto Dei iudicio, huic ipsi loco, in illustre ornamentum desti-



destinata, vberes cum prouentu fructus in lucem erumpentes proferebat, & tantò præ cæteris gratiores, quantò à vitæ innocentia, modestia, abstinentia, quandam peramænam venustatem capiebant. Latere non potuerunt, quamuis depressa, sui despicientiâ, & amore contemptus sæpius humiliata fuissent, studiorum incrementa, & perspicacis ingenij acmina; sed in debitis ac consuetis exercitijs, quandoq; vt scintillæ, quandoq; vt radij instar fulguris illucescētia, vi sua natua se prodebāt. Et quia tanquam lucerna ardens, super candelabrum in domo Domini reponi debuit, vt in ea ambulantibus luceret: & tanquam palmes insertus viti, vitæ integerrimæ exemplo, tanquam foliorum viriditate, ymbraculum angustiat, in æstu tribulationum parabatur, & qui doctrinæ salutaris vbertate, tanquam vuarum dulcedine, angores animi exhilararet: & quia tanquam fons paruus, in fluuium crescere debuit, & in aquas plurimas redundare, quibus  
Christi

Christi fidelium animas, tanquam plantas irrigaret ac fecundaret, ita disponente Deo, & eorum quorum se potestati permiserat, consilio accedente, omnes in bonis literis, & in Philosophia gradatim dignitates suscepit: ad extremum, ipsi supremo Doctoratus in Theologia honori, submisit caput, illiusq; operoso muneri humeros subiecit. Iam quoq; susceptum sacerdotij munus, officium illi ac necessitatē, tantò impensius docendi imposuerat: illud dictum D. Pauli, tanquam ad se directum, semper animo versans: *Exemplum esto fidelium: in verbo, in conuersatione, attende lectioni, exhortationi, & doctrine, attende tibi & doctrine, insta in illis: hoc enim faciens, te ipsum saluum facies, & eos qui te audiunt.* Illud quoque monitum D. Ambrosij, tāquam ab hoc fonte, diuini oraculi haustum, sedulò voluebat: *Ante vita, quàm doctrina querenda est: vita enim bona & sine doctrina habet gratiam: doctrina sine vita integritatem non habet.* Sibi igitur hanc legem ponit, vt cum dictis facta  
concor-



concordent, & primus illius virtutis in se experimentum capiat, ad cuius studiū alios inuitat, illamque doctrinam solam in animis audientium germinare sicut lilium, & fructus virtutum afferre, quę docentis recte viuendi exemplo, est firmata. Huc itaq; confusus de gratiæ auxiliantis suffragio, omnem curam, ac sollicitudinem conuertit, vt vitam suam ad Euangelij præscripta, tanquam ad speculum componeret, donec in se Christum, illius vestigia imitando, formaret.

## C A P V T III.

*De studio Humilitatis cum sui despicientia.*

**P**Rimum omnium Humilitatem, quod Christi exemplo sanctificata esset, & eiusdem encomio commendata, plurimum adamauit; tanquam firmissimum virtutum omnium fundamentum, in quo spirituale sanctitatis ædificium extrui debet, & ad cœlestia sublimari. Hanc animo suo medul-

dullitus infixam, hanc in tabulis cordis insculptā esse, summoperè exoptabat: secum assiduò recogitans, soli diuinæ maiestati excellentiam, sublimitatem, celsitudinem, propter æternitatis durationem, propriam, & hæreditariā esse: homini verò nihil germanius vilitate, abiectiōe, cū sit figmentum de limo vilissimo, & post recessum ex hac vita, putredo & vermes hæreditabunt illum. Considerabat quā sit vehemens, quā violenta ad vitia, ad interitum promptitudo, ex labe primi peccati contracta: & quā validis auxilijs diuinæ gratiæ indigeat, ad pietatis & iustitiæ opera exercenda. Sibi itaq; ipsi verissima cognitione vilefcebat, se, in veritate, dignum quouis contemptu, ac dedecore iudicabat: nam omnes quoscunq; vidit, sibi anteponebat, eosq; tanquam se meliores, honore præueniebat. Non inflabat illum scientia, multiplici cognitione ac rerum varietate instructa: non cele-



celeres ingenij motus, disputationum fervore accensi, & cum acumine vibrati: non honores Academici, virtutibus eius ac doctrinæ debiti, extollere potuerunt: non denique suprema dignitas, quæ alias antecedit, Doctoratus in Theologia delata, elatiorrem fecit, sed vitæ austeritate multiplicata, in recondito animi sui recessu, vilior in oculis suis apparuit, & haberi ab omnibus studeuit. Satis illi in Collegij convictu, humiliandi se occasionum aderat, sed hæc humilitas visa est ei honorata, quòd non ab omnibus, ob quandam iam conceptam sanctitatis opinionem, despiceretur. Regiones itaque remotas, vili assumpto habitu, pauperis peregrini obibat, cum alijs de causis, tum vt omni exutus honore, contemptu, abiectione, opprobrijs saturaretur.



*C A P V T IV.**De admirabili simplicitate.*

**S**IC ad ima profundæ abiectionis, animo  
 per veram humilitatem deducto ac de-  
 fixo, morum quædam temperantia, mirâ  
 simplicitate venustata, subsecuta est, effigiẽ  
 innocentiaẽ amissã referens. Nam in vitæ  
 suæ actionibus, candorem animi absq; omni  
 versutia coluit: ignoravit sapientiam huius  
 seculi, quæ per ostentationem multa fingit,  
 per fucum gloriam aucupatur; sed sapien-  
 tiam Dei, & scientiam Sanctorũ didicerat;  
 deponens omnem malitiam, & omnem do-  
 lum, & simulationem, sicut modò genitus  
 infans, & quam animo innocentiam, & pu-  
 ritatem retinuit, hanc seclusa varietate, di-  
 ctis & factis exhibuit. Cum enim solitarius  
 nullũ in comitatu habens, sed de præsentia  
 ac protectione Dei certus, in cuius iugi re-  
 cordatione in omnibus vijs ambulans, iucũ-  
 daretur:



daretur: siquidem cum simplicibus sermocinatio eius: cum sic, inquam, solus, gressus Romam dirigeret, ecce derepente profiliunt è latebris prædones: sanctum inuadūt: indignis modis tractant: verberibus contusum spoliant: quicquid pecuniæ ad subsidium viatici erat, auferunt: insuper tormenta minantur, ni spontè residuum tradat. Ex hac inopinata perturbatione, oblitus aliquot aureorum, qui in veste insuti latebant, cōfessus se nihil amplius retinere. Sed postquam animum ex metu recepit, & reconditioris pecuniæ recordatus fuisset, exhorruit, dolore & anxietate animi consternatus, concito gradu abeuntes insecutus, multis precibus inuitans, vt ad se redirent; coram quibus in genua procumbens, se in Deum peierasse, diuinamq; indignationem meritò incurrisse confitetur: & quicquid per obliuionem reseruatum erat, totum lubens tradit. Hanc tantam viri simplicitatem illi ad-

B 3

mirati,



mirati, pedibus eius aduoluuntur, erepta restituant, veniam precantur, quam ille facile condonat. Tuum est dogma, ô mundi Saluator, & cœlestium præceptorû seminator: *Estote prudentes sicut serpentes, & simplices sicut columbæ.* Iam mete fructus, quos in viro sancto seminasti. Imitatus est serpentis prudentiam, dum ad speciem mendacij, per imprudentiam commissi, & in animo suo obuersam expauit. Imitatus columbæ simplicitatem, dum de vlciscendo non cogitauit: sed ad hostes, tanquam ad amicos accessit; & oblitus iniuriarum, nouis beneficijs ornat, illud Apostolicum implens; *Vos autem nolite deficere benefacientes.*

### C A P V T V.

*De Pietate in Deum, seu cultus diuini seruore.*

**P**ietatis ac cultus Dei studium, ab ineunte ætate, vbi primùm ratio fungi suo officio cepit, tantoperè complexus est, vt ter-  
reno-



renorum expungens cupiditates, iam in cælo conuersari videretur; eam denique, toto vitæ tempore, mundam & imaculatam retinuit. Sciebat eò mentē dirigendā esse, quò vultus erectus est: qui cœli pulchritudinē & amplitudinem admirans, ad tantī opificij conditorem colendum inuitat. Sciebat ex munere vocationis suæ, cognitionē sapiētię ad se pertinere, sed nolebat à seipso sapiens esse, sed ab illo illustrante, de quo scriptum est: *Omnis sapientia à Deo.* Hominis autē sapientia, pietas est, quæ animos deuotos, ac Deo colligatos, admirabili rerum sublimium cognitione illustrat. Tantò autem ardore Dei inflammatus flagrabat, vt templum in domicilium potius, quàm Collegiū elegerit: pectus enim pio amore sauciatum, & sanctę deuotionis affectu calens, expeditis professionis munijs, Christi Dei suauissimam præsentiam, quam in sanctissimo Eucharistiæ Sacramento agnoscebat, in domo orationis  
requi-

requirebat. *Adducebas eum Domine in montem sanctum tuum, & lætificabas eum in domo orationis tuæ. Verè adducebas. Quomodo enim in odorem vnguentorum tuorum curreret, nisi eum funiculis, amorosæ dilectionis traxisses. Vos ó robusti funiculi, in textrina amoris diuini complicati, vos cor eius vinciebatis; & suauis iucunditate impinguatum, in conspectu Dei sistebatis. Adducebatis eum in montem sanctum beatæ cōtemplationis, vbi spiritus eius, intelligentia cœlestium irradiatus, & desiderijs æternę dulcedinis accensus, in Deum rapiebatur. Lætificabas eum Domine, in domo orationis tuæ, dum in eo iuge desiderium, vehementius amandi te ipsum excitabas: dum illi te ipsum crebris inspirationibus manifestabas: & quasi amicum, in domo non aliena, sed tua, quæ est orationis, suauissimis diuinarum consolationum epulis satiabas. Frequens illi & vsitatum erat, in sacrificijs laudum offerendis*  
*Deo,*



Deo insomnes noctes ducere: & dum silentium noctis profundum esset, adire imaginē pietatis in ingressu Collegij tanquam in larrario affixam, quę Christum denudatum, & parte media è sepulchro prominentem, & è vulnere lateris sui copiosum sanguinem fundentē, cui nimium flebilis & dolorosa Virgo assistit, repræsentat; & coram eadem se abijcere, Dei in carne passi dolorum acerbicatem secum meditari: peccatorum suorum gravitatem accusare: maculas vberum lachrymis eluere: diuinę misericordię in condonandis offensis facilitatem admirari: & in hac feruenti cordis sui effusione, mentis excessus pati: dumq; sic amaritudine plenus affligeretur, cœlestis vox ab eadē imagine reddita, sæpius eum consolata est, vt traditio Patrum Maioris Collegij, constāter asseuerat. Et cum eadem imago, consensu eorundem Patrum, post vitā functū, summum illius cultorem, in Ecclesiam S. Annę

trāsportata fuisset, vt ei maior veneratio exhiberetur, miraculosè ad priorem remeavit locum; in quo etiam nunc conspicitur, scilicet, vt huius tanti beneficij apud posteritatem testis esset; suæq; custodiæ ac patrocinio, locum hunc diuinitus sibi cōmissum, vt tueretur. Sacerdotis munus, ipsis humeris Angelicis tremendum, sciebat in ministeriū altaris institutum esse, vt viuificis mysterijs, in odorē suavis fragrantiaē oblatis, Deo cultum, gratiarum actionis, pro omnibus beneficijs, humano generi impensis, exhibeat: illiusque indignationem, peccatis irritatam, conciliare possit; atq; ex eo, quod sciret in offerentem, ob diuinam refectionem perceptam, fontem gratiarum ac satisfactionis redundare. Nullum itaq; diem abire patiebatur, quo sacris non operaretur. Si verò cōtingebat, vt in publicis deliberationibus rogatus sententiam, veritatem strenuè propugnasset: aut vitia, paulò feruidius fuisset insecta-

sectatus, vehementi dolore animum affligebat; veritus, ne alicuius aut animi tranquillitatem turbasset, aut existimationem læsisset: identidem, tãquam acerbus vindex iniuriarum pximi, hos versiculos in sui reprehensionẽ à se cõpositos, sibi improperebat;

*Conturbare caue, non est placare suaue :*

*Diffamare caue : nam reuocare graue.*

Tandem summa cum animi demissione, singulos conueniebat, obsecrando, vt veniam erratis darent; siquidem nisi hac obtenta, affirmabat, se non posse sacrificare. O bone IESU, humilium magister, si hæc est iniuria, ac cõtumelia, quẽ veritati testimoniũ perhibet: vitijs indignatur: & si tanto dolore, & sui cõfusione, ante Missæ sacrificium expiatur: quid fiet nobiscum, qui odijs ac inimitijs onusti, ad altaris cõmunicationem accedimus! Hic cultus quotidiani sacrificij, hostem Dei, ac seruorũ eius, plurimũ torquebat; vnde illius interturbandi causa, rem



miram excogitat. Quodā die, cum ex more deuotione flagrantissimus, diuinis mysterijs ad altare vacaret, & frequēs multitudo positis in terram genibus, non mediocrem cōsolationem caperet: Draco infernalis hirūdinem mentitur, (hyems tunc media, frigoribus sæuiebat) & dum hostia sacra cum calice eleuanda erat, & populus deuotam adorationem pararet, cæpit circumuolitare, pennis plaudere, cantu hirundinis perstrepere, & animos hominum nouo spectaculo distrahere. Cognouit vir sanctus, diuinitus edoctus artem Polypi tartarei, & sacris ad finem deductis, fores obsedit; & cupientē foras prorumpere, manu comprehendit; & cum sursum eleuat illidendum, populus circumfluens inclamare ac orare vehementer Sanctum non desinit, vt aui innocuæ, & diuinorū ignaræ, ignosceret. quibus ille: mox, inquit, experiemini, quod genus huius aui. vix illisa horribilis Draconis speciem assumit,

mit, qui sibillo indignationem testatus, disparuit. Ab hoc affectu summæ pietatis in Deum, illud quoque profectum erat, quòd cum Ilcussium, (fodinis metallicis, ac civium virtute, & mercimonijs celeberrimum) Pastore destitutū à Patribus Collegij, ad quos de iure hoc munus cōferendi spectat, in defuncti locum, alium idoneum efflagitaret. Placuit omnibus V. viro tantum officiū imponere: quod ille non grauatim suscipit, omnesq; in eo boni Pastoris partes, adimplere satagebat. Vitę enim inculcata innocentia, & sparsis voce sua diuinis præceptis, ad religionis, ac virtutum studium, commonefaciebat. Videres plurimos vitijs renuntiare: peccatorum inquinamenta expiare: prauas consuetudines perrumpere: supplicia delictorum vario cruciatu, vestigia Pastoris sui sequendo, ex se sumere, & erecta probitatis trophæa imitari. Et dum tanquam verus Pastor in specula cōstitutus, vigilias super gregem

gem sibi commissum custodiret, rursus voluntate Patrum, accepto successore, ad onera professionis reuocatus, magno apud omnes sui desiderio relicto, recedit. Beatæ vrbes, quæ in hac vita, viros sanctitate illustres, sunt meritæ Pastores habere: nam post hæc, in illa immortali, Patronos experientur.

### *C A P V T VI.*

*De patientia & tolerantia aduersitatum voluntariè susceptarum.*

**E**T cùm sit gradus, ad sublimitatem perfectionis, tolerantia tribulationum, illiusque proprium munus, mala ab alijs inflicta, equanimiter atq; cum gaudio pro Christo pati, illius exercendæ ac comparandæ amore flagrare cæpit; viamque duplicem, colluctandi cum aduersis est ingressus. Primum illi certamen fuit in molestijs, vexationibus, eorum quibuscum viuebat, perferendis. Inuidia enim aduersaria virtutis, varijs nocen-



nocendi modis armata, plurimas machinata est calamitates: quibus animum Sancti constantem labefactare posset; nunc maledictis infectando: nunc conuitijs perstringendo: nunc virtutibus simulachra vitiorum attingendo: nunc in faciem fraudulentem laudando: nunc ex morum grauitate, captatis mordacibus iocis conturbando. Et hos omnes perturbationum aculeos debere eos pati, ex doctrina Apostoli didicit: *Qui pie vivere volunt in Christo Iesu.* Quali autem scuto, hæc iacula ille excipiebat, ac ne se ferirent, muniebat, quia assiduitate fuit ipsi proprium, imitatione autem alijs cum debeat esse commune; vsui publico est ostendendum. Pungebat eum quis lingua; ille solebat vnico verbo ictus excipere, sibi met dicendo, *Vt supra.* hoc est, nihil noui patior, sed quod supra is, qui supra omnes passus est Christus, prius pertulit. In archetypum ergo, ac supremæ patientiæ exemplar, quod in monte *supra* monstratum est,

est, oculos conuertebat, & sic dolores vetustate exemplaris, & acerbitem, crucis excessu leuiorem, immó leuissimam sibi reddebat, ac in omni tribulatione, gaudio superabundabat. Et ne in eo, charitas imperata à Christo, erga proximos etiam maleuolos, & in se sæuientes refrigesceret, hoc idem intra se, *ut supra* cōmemorabat: videlicet in Christo cruci confixo, dilectio erga inimicos extingui non potuit; nec verberibus, nec crucis ignominia, nec totius corporis laceratione, nec ipsa mortis acerbitate. Ad hoc igitur *Supra*, sibi connitendum oblitterandæ iniuriæ, inutiles querimoniæ abijciendæ, & illi quorum opera Capiti nostro corona, nunc quidem spinosa, sed postmodum gloriosa texitur, summoperè complectendi. Hoc deniq; dictum *ut supra*, renouabat illi Sanctorum tormenta, carceres, inediam, & per summam crudelitatem excogitata mortis genera: & quòd his asperitatum

tatum gradibus superatis, aditum supremæ beatitudinis sint consecuti: & hac recordatione animatus, omnes omnium molestiarū incursus forti animo tolerabat. In his domesticis progymnasmatibus patientiæ, animus eius roboratus, aliam palæstram longè difficiliorem ingreditur, studium peregrinandi ardore Christianæ religionis accensus, & Dominicæ passionis inflammatus, arripit; atque in primis terram sacrosanctam adire & perlustrare statuit, quæ vestigijs Dei in carne nostra cōuersantis, & salutem humanam operantis, consecrata est; illudq; desiderium in se impleri optauit: *Adorabimus in loco, ubi steterunt pedes eius.* Singula ex ordine viuifica loca, imbre lachrymarum irrigatus visitabat; adorans & osculans præcipue mōtem Caluariæ, Christi sanguine respersum, & victoria Crucis celeberrimum; ipsumq; omnium sepulchrorū sanctissimum, & triūpho Resurrectionis gloriosissimum Sepul-

D

chrum



chrum gembundus veneratus est. Quas regiones dum peragraret, quanta cum pati necesse erat, dum inter gentem barbaram, & Crucis Christi, & illius cultorum, inimicam versaretur: & iter suum per varios locorum anfractus, promoueret; frigus, calores, sitim, famem, inopiam, & vitæ difficultates, aliasq; æumnas sustinendo? Sed hæc incommoda, & alia his grauiora, pharmacū animo eius afferebant; dum mentem suam à venialibus offensis, quas ille instar mortaliū deplorabat, his tribulationum laboribus, sanari posse cogitabat, & vultus diuini benignitatem in Sanctorum retributione, pro illis se experturum. Postquàm gaudio plenus, menti suæ impressa mysteria Passionis circumferens, eademq; assiduè cogitans, ad propria remeauit: vix dum corpori aliquantum quietis, ex tam longinquo ac laborioso itinere, colligendis viribus, quod satis esset, concesserat; cum ecce nouo se itin-

neri

neri accingit. Romam magistram fidei, religionis Christianę custodem ac interpretē, inuisere properat, & magna cum animi voluptate ad sacra illa limina, ad quę totus suspiratorbis, venit; pretiosaq; pignora principis Apostolorum, & Doctoris gentium, eodem monumento inclusa, veneratur: inde spiritu exultans, ad reliqua loca Martyrum certamine gloriosa, & sanguine purpurata, gradum dirigit: & tanquam præsens ibi adstantium, & vota Deo, illorum suffragijs cōmissa offerentium, consortio fruitur: se ac vitę suę cursum, & ex ea egressum, illorum precibus commendans: capiebat animo nō mediocre solatium, & se cælestium conuersationi interesse arbitrabatur. Et quamuis illius membra ieiunijs, vigilijs exhausta pallebant, & itineris molestijs, quod semper pedibus obibat, emaciata languebant: animus tamen cœlesti quodam erectus gaudio, infirmitatem corporis sustentabat, & virtus in

infirmirate perficiebatur. Quid igitur mirum? si corpus, & viæ lassitudinem, solis ardorem, ventorum ac imbrium ferocitatem, cœli hospitium molle stratum, quod humus dabat,, hilariter sufferebat, illud ē Psalterio occinens: *Secūdam multitudinem dolorum meorum, in corde meo consolationes tuæ letificauerunt animam meam.* In eadem peregrinatione, cū à prædonibus raptatus, spoliatus, ac cæsus fuisset, vt iam cōmemoratum est, nihilominus patientiæ clypeo munitus, pergebat gaudens, quòd pro nomine Iesu contumeliā pati sit dignus habitus. Et hæc quidem tot tristia, tot acerba, tot vitæ pericula in Romano itinere expertū, quæ alios ab iterando retrahere solent, ad hoc ipsum tribus alijs vicibus iterandum induxerunt. Et cū ab hominibus suæ gentis, de causa tam frequentis visitationis Romam inquireretur; respondit: Iter Romanum videri sibi purgatorium, illiusq; frequentationem à pœnis peccato-

cato-



catorum expiari cupiebat. Et hac quidem peregrinatione tam frequenti, nihil vnquam dispendij vir venerandus debitis officijs, suę professionis adferebat, cū lex sit publica, quę Professoribus, loca sacra adeundis facultatem permittat, quod ex illius præscripto, seruatis temporum interuallis, cōmodē sine vlla negligentię nota fieri potest, in tāta præsertim Professorum copia, ex quibus Vniuersitas studij Cracouiensis coalescit, vt vnus etiam alteri, mutuam operam, aut egritudine oppresso, aut pio negotio dedito, nauare possit.

*C A P V T VII.**De mortificatione corporis.*

**H**IS tot & tantis calamitatibus, cū satis caro viri Sancti afflicta esset, nūquam tamē ab alijs eidem infligendis cessabat. Sciebat enim carnem, aduersus spiritū concupiscere, & magno esse his impedimē-

to, qui mundioris vitæ institutum sequuntur. Mollitie vestium, ac splendore spreto, externo corporis cultu, nec nitido, nec nimium abiecto utebatur, sed moderato, & statui suæ competenti, ut ex veste eiusdem in Archivio Ecclesiæ S. Annæ asservatâ, conijcere licet; interius tamen, quod carnem aliquo duriori severitatis modo castigauerit, ex his quæ dicemus, suspicamur: in ieiunijs enim assiduus erat; in vigilijs & orationibus frequenter pernoctans: & dum omnia præ hyemis acerbitate rigerent, nudis pedibus desuper contectis, ne à quoquam incedēs, notari & observari posset, templa adibat, & in his, divinis inardescens orationibus, summa cum animi iucunditate, morabatur. Doctor in Theologia renunciatus, esum carniū sibi interdixit, & eam legem, ad ultimum vitæ spiritum inviolatam servavit. Conatus hanc aliquādo hostis abstinentiæ infringere, gravi excitata cupiditate vescēdi carnes, sensit

vir eximius aduersarij dolum, iubet subito frustrum carnis assari, & de veru depositum adferri, arreptoq; dum instar carbonis igniti arderet, primùm faciē, deinde vniuersum corpus tundendo adurebat, hæc verba improprians: *Caro carnem expetisti, carnibus ad satietatem utere.* Hoc tam sublimi afflictionis actu, quo cura sui abiecta, vim sibi inerebat, elusit technas inimici, & omnem in posterum carniū appetitum, diuino crediderim beneficio, amplius non rediturum, in corpore suo extinguebat. Si quando mēbra defessa, sopori reficienda committebat, ea in dura humo abijciebat; quandoq; iam senilia, calore natiuo destituta, & frigore constricta, stratâ pelle vrsi confouebat.

## CAPUT VIII.

*De operibus misericordie.*

**I**N operibus misericordiæ præstandis, & in egenorum necessitatibus subleuandis,

pro-

pro-



propterea feruentior erat, quòd diuino mādato præciperentur, & spatia charitatis ampliarentur, & supremi iudicis fauorem promererentur. Emeritum itaq; laboribus Academicis, stipendium quouis anno cum egenis partiebatur: parte sibi exigua ad vitā sustentandam reſeruata; reliquum in varios vſus pauperum erogabat; nunc veſtes, nunc calceos comparando; & in alia indigentiae neceſſaria exponendo. Eo denique in miſericordia pauperibus exhibenda proceſſerat, vt ſe neceſſarijs vitæ, & corporis ſpoliaret; vt illorum inopiæ ſubueniret. Vſitatum illi erat, & prorsus in morem abierat, vt ſiquē egenorum in occurſum ſibi venire ſine calceis conſpiceret, proprijs detractis, nuditatem illius operiret, ipſe diſcalceatus, ad ima pedum demifſo pallio, nuditatem contegens, domum redibat. Quodam tempore, cum præteriens in platea pauperem niuib; coopertū, & totis artub; præ frigoris acrimonia

monia contremiscentem reperisset, misericordia motus, proprium illi palliū, (primum industria vsus, ne factum ab aliquo videri posset) largitur; illud implens, quod Veritas per Ioannem præcepit: *Qui habet duas tunicas, det non habenti.* Domum rediens, dum in Oratione prostratus persisteret, ipsa Mater misericordiæ Virgo Beatissima, eundem visitare, & vultu suo iucundissimo recreare dignata est; mirificè collaudans hoc tantum misericordiæ opus, alienę calamitati impēsū, eidemque illam ipsam vestem, qua pauperis nuditatem contexit, restituit. Impleta est abundè in viro sancto, illa promissio diuina: *Fæneratur Domino, qui miseretur pauperis, & vicissitudinem suam reddet ei.* Illud quoque animi eius impensè in pauperes effusi, fuit clarissimum argumentū. Accumbebat mensæ vir Sanctus, & cum eo nonnulli nobilium filij, illius curæ ac institutioni commissi: & cū singulis carniū frustra distribuisset, extre-

E

mum

num sibi sumpfit, ( tunc enim adhuc carnibus vescebatur, ) cum ecce vox pauperis stipem rogantis insonat, iubet ille confestim pauperi dari, propriam carnis portionem. Mirari commensales, & inter se mullitare, atque etiam anxij inquirere non cessant, solliciti quid manducaret: tandem ex improviso, Diuina virtute largiente, illud ipsum frustum carnis, cunctis stupentibus, ante virum sanctum, in mensa repositum, conspiciunt; quod ille, tāquam annonam, ex penu diuinæ providētię sibi missam, cū gaudio suscipiens, Deo gratijs actis, eodē vires suas reficiebat. Verè iactauit super Dominum curam suam, & ipse enutriuit eum. Specimen autem hoc miraculosum, diuinę retributionis, quo Deus beneficentiam pauperi exhibitam, tunc in sancto remuneratus est, initium præbuit, & incitamento fuit, nouæ & memorabilis in posterum seruandæ, cuiusdam sanctę consuetudinis. Permoti enim Patres & Professo-



res Maioris Collegij illo spectaculo, sanxerunt, Pauperem, seu Christum in forma pauperis, mensæ suæ, quotidie de demenso suo alendum, socium lege nunquam mutanda, habere: quæ lex & consuetudo, hucusq; religiosè seruatur. Si verò contingat pauperē ad fores loci, in quo Professores reficiuntur, venire: statim vnus ex Professorū pueris, cui hoc negotium, ex ordine demandatum fuerit, excurrit ad eum, qui mensæ præsidet, his verbis denuntians; *Pauper venit.* Ille excipiens cū veneratione, respōdet; *Christus venit.* Mox illi cū charitate elēcmosina præbetur. Ab hoc etiam fonte benignitatis, manauit pia fundatio, quorundam Professorum peculio comparata, pro pauperib. singulis annis vestiendis. Fuit & hoc opus miraculosum misericordiæ D. Cātij, quòd cū quædā ancilla è foro domum rediens, vas fictile, lacte plenum, deferret, subitò ante conspectū eius, dum ad Ecclesiam S. Annæ properaret,

concidit: ex eo casu, vbi videt vas fractum, lac effusum, incipit cum fletu lamentari. Motus illius lachrymis D. Cātius, quibus de dominæ suæ seueritate conquerebatur, iubet eam testas colligere, & sibi dari. colligit illa, & Sancto porrigit: res mira, ex contactu illius, vas redintegratur. Mulier, quòd lac adhuc deesset, à fletu non desistit; idcirco rursus ei D. Cantius mādāt, ex vicino fluuiolo, Rudawa dicto, quod vrbis mēnia alluit, aquā haurire. haurit illa, confidēs de Sancti meritis: & ecce videt aquam in lac purissimum conuersam. sic læta domum redit, miraculum prædicat, & virtutem Dei in viro Sancto dilaudat.

## C A P V T IX.

### *De dono Prophetiæ.*

**F**Vit etiam vir Sanctus, gratia & dignitate prophetiæ à Domino honoratus. Cū enim quodam tempore, incendium excitatum,

tum, in plateam S. Annæ flammarum globis  
irrumperet, & in ædificia sæuiret, & multo-  
rum bona depasceret: miseratus hominum  
tam insignem calamitatem, ad Dei miseri-  
cordiam implorandam, cum vix conuersus  
fuiſſet, ſubito conſpicit virum, ætate floren-  
tem, & luce maxima coruſcantem, S. Sta-  
niſlaum Episcopum Cracouiensem, qui iu-  
bet Sanctum ſecuro eſſe animo; ſpondens  
ignis vehementiam vltra nō progreſſuram:  
ſed eidem mandat, vt vniuerſo populo de-  
nuntiet, fore breui lōgè grauius incendium.  
Prædixit ille, ad fructus dignos Pœnitentiæ  
faciendos, omnes inuitans, ſed cū antiquis  
ſceleribus, noua accumularent flagitia, pro-  
ceſſit iuſta Dei indignatio, ad illam pœnam,  
quæ à viro Sancto prædicta fuit, irrogan-  
dam; nam immiſſa vis flammarum, quæ  
coërceri non potuit, non me-  
diocrem vrbiſ partem  
vaſtauit.



## C A P V T X.

*De conuersatione ipsius cum viris Beatis, qui illius seculo, vitæ sanctitate claruerunt.*

**P**ost completos Professionis labores, & post oblatum Deo thymiana suauissimæ orationis, rarò quidem corpore, sed animo semper, consuetudine virorum Sanctissimorum, qui eius tempore vixerunt, fruebatur: illorumq; è colloquio, aut ex sola duntaxat recordatione, puritatis illorum vitæ, ac sublimium meritorum, calore diuinæ dilectionis exardescibat. Fulgebat tunc Cracouia, tanquam lucidissimis luminaribus, vndiquaq; cincta, ac illustrata; dum eā fidus illud præclarum B. Suentoslaus, in ædibus B. Virginis in circulo constitutis, officio Mansionarius, perpetuo silentio admirabilis, illuminaret: & dum in eam illud luminare splendidissimum, B. Simon Lipnicus, in Ecclesia Fratrum de Obseruantia, charitatis

ratis & sanctitatis Seraphicæ, radios expor-  
rigeret: & dum B. Stanislaus Casimirianus,  
Ordinis Canonorum Regularium ab Ec-  
clesia SS. Corporis, effusam lucem integri-  
tatis, ac innocentiae vitæ spargeret: & dum  
B. Ilaias, Ordinis Eremitarum S. Augustini,  
tanquam lucidissima stella, scintillans sum-  
mis virtutibus lucē tibi infunderet: & dum  
B. Michael, Ordinis S. Mariæ de Metro, in-  
star sydereæ lampadis, probitatis suę lumen  
in te defigeret. Quidni etiam nunc dicam?  
te non solum his splendoribus irradiatam,  
sed illorum sanctissimis reliquijs, tanquam  
firmissimis propugnaculis, contra omnes  
insultus hostium, animę & corporis vallatā  
esse? Beatam te, si tuam felicitatem agno-  
fcis, & si te gratam pro tanto beneficio Deo  
exhibes: & si ad SS. præsidia confugiens,  
virtutum exempla imitari volueris. Et hos  
quidem Sanctissimos viros, tanti vir eximi-  
us fecit, vt se tacita mentis cogitatione,  
summe

summè beatum fore iudicaret, si vel minimam partem, illorū sanctitatis consequi posset, & in consortium æterni præmij admitti.

*C A P V T XI.*

*Catalogus brevis laborum, quos in statione Academica sustinuit.*

**P**Lacuit hîc subiungere breuem Catalogum laborum, & tanquam speculum proponere, quibus inclytus Cantius, in sua statione Academica, perfunctus est. Functio Academica docendi, nemini publicè exercenda committitur, nisi qui aliquo honore ab ingenij laude, & literis adepto sit decoratus, & præstito iuramento, boni cōmunis promouendi, sit in gremium Professorum cooptatus. Primum itaq; gradum, ac primam lauream in philosophia, vt tabulæ antiquæ Metricæ testantur, Anno à partu Virginis, M. CCCC. XV. consecutus: post primam Academiæ Cracouiæ fundatiōē  
anno



anno quindecimo. Completo biennio, quod iuxta legum præscriptum, & in studio Philosophiæ, & in cōtentionibus prælectionum & disputationum expediri debet, Anno Salutis, M. cccc. xvii. Doctoratū in Philosophia suscepit: tandē in Decanū Facultatis Philosophicę biselectus, vczť Añ. M. cccc. xxxij. & Añ. M. cccc. xxxvii. Quod munus nō nisi ob singularem, & multis argumentis probatā doctrinam, alicui defertur; & illius officij est, præter Quæstionū in Philosophia naturali resolutiones, (ad quas singulis diebus obligatur) omnibus disputationibus, quæ bis in septimana publicē peraguntur, tanquam moderator & arbiter earum supremus præesse. Post exactum curriculum in Philosophia, ad Facultatē Theologicam admissus, quinquennij spatio in ea defudauit, varios, legibus descriptos, in hac Facultate gradus, summis laboribus prensando. Ad extremū, laurea Doctorali insignitur. Hac oblata dignita-

F

gnitate, cogitare cæpit, se inuitari ad meditando in lege Domini, ad frangendum & dispensandum paruulis panem cœlestis sapientiæ: ad cathedras pestilentia subvertendas: ad vitiorum monstra, ex cordibus hominum profliganda, & ad teneras fidelium mentes, in religionis ac virtutum proposito constabiliendas. Et ne alijs prædicando, ipse reprobis inueniretur, seipsum tanquam ministrum Dei, ad recipiendam illuminationem scientiæ Dei, & ad illius custodiam, indicta sibi in perpetuum carniū abstinentia, frequenti meditationis exercitio, & arctioris vitæ instituto, se communire constituit. Quo in munere, quales illius contentiones fuerint, nō difficile est augurari, cum Commentaria in D. Matthæum, illius manu scripta, & in tres tomos digesta, retineamus. Retinemus & librum Sermonum, quibus verbum vitæ, mysteria salutis, & monita ad repromissionem cœlestis gloriæ consequendam necessaria, Cracouiæ annuntiabat.

## C A P V T VIII.

*De transiū ex hac vita ad immortalē.*

CVM iam vir eximius, & annis & laboribus, & vigilijs, & ieiunijs, se fractum cerneret, & tabernaculum corporis sui, varijs infirmitatibus languens, videret; iamq; diem resolutionis suæ instare præsentiret, totus se ad comparandum animæ suæ exitū Christianum conuertit: quicquid adhuc rerum ad vitæ conseruationem necessariarum retinuerat, totum pauperibus distribuit: demum lachrymis perfusus, peccata sua sacramentali Confessione expiabat: & corporis ac sanguinis Christi, viuifica refectione corroborabat; vniuersis animæ suæ viribus, per mentis eleuationem in authorem vitæ, & maximorum beneficiorum largitorē intentus. Deniq; alijs sacramentis ritè perceptis, in præsentia Patrum Collegij, Deo ac Beatissimæ Virgini, animam purissimam tradidit,



dit, & iucundissime in Domino obdormiuit,  
 Anno Salutis, M. CCCC. LXXIII. die xxiv.  
 Decembris. in Vigilia Natiuitatis Domini  
 Nostri IESV Christi. Corpus eius, in Ec-  
 lesia Sanctæ Annæ, (quæ est Academiæ ad-  
 scripta parœcia, eidem ex opposito adia-  
 cens) honorifice sepultum est. Sic Venera-  
 bilis Cantius, vt in vita multis virtutibus ac  
 miraculis claruit: ita & post mortem, dum  
 plurimis, opem illius implorantibus, diuina  
 misericordia, ob merita eius, succurrit, in-  
 clarescit. Multis enim mortuis vitam, cæ-  
 cis visum, claudis gressum, & varijs languo-  
 ribus oppressis, ac in maximis necessitati-  
 bus constitutis, sanitatem, leuamen, adiuto-  
 rium, consolationes, impetrauit, & hucusq;  
 impetrat, Præstante omnia Domino nostro  
 IESV Christo, qui cum Patre & Spiritu san-  
 cto, per infinita seculorum sæcula, est  
 Deus gloriosus, & benedictus.

Amen.

CA-

## C A P V T XIII.

*De quibusdam miraculis, quæ mortem eius  
subsecuta.*

**P**ostquàm spiritus eius, solutus vinculis corporis, & stola immortalitatis indutus, ad consortium perenne, diuinitatis fruendæ est admissus; sacros eius cineres, non est passus Deus ignobiles latere: sed plurimis, ac continuis miraculis, tanquam voluntatis suæ appositis signaculis, & euidentissimis amoris pignoribus, quibus sanctitatem eius attestaretur, coruscare voluit. Quorum frequentia ac magnitudo effecit, vt sacræ eius reliquiæ, quæ sub Cathedra Ecclesiæ defossæ iacuerant, eleuatæ & ablutæ, & in stannea arcula incluse, in eum locum, qui ex lapide secto eleganti opere, & artificio, elaboratus conspicitur, statuam Diui ante Beatæ Annæ imaginem decumbentem, spectandam exhibēs, transferrentur. Horum fama,

etiam remotiores regiones peruasisse videtur & adimpleuisse: vt Marcus Antonius Sabellicus, Tomo II. Eñeade X. lib. iv. in descriptione Poloniae Catalogo Beatorum adscriptum existimarit. Sic enim inquit: *Caput in ea gente Cracouia vrbs ad Istule fluminis ripam, cum celebri Gymnasio omnium liberalium artium.* Et paulò inferius: *Iacynthus Dominici Calaguritani comes, Cracouia situs: Cantiusq; Cracouiani quondam Gymnasij Doctor, ambo in Beatorum numerum delati.* Quæ autem hæc sint, interrim reticemus, donec eorum iudicio, quibus hoc negotium cōmissum est, approbata fuerint: illorum tamen summarium, quod Matthias de Miechouia cōfecit, quibus eum Deus, illius temporibus illustrauit, illius verbis subiicimus: *A die autem mortis eius, vsque in annum Domini M.D.XV. varijs egritudinibus oppressi, voto facto, curati sunt octuaginta tres homines: febricitantes verò tredecem: paralitici quinque: verè mortui, addicti sunt vitæ pristinae sedecē: ferè mortui & deplorati sex: phrenetici sex: Demoni-*  
*maniaci*



*moniacus unus liberatus: iumenta morientia, facto pro eis voto, sanata duo.* Et his alia longè plura subsecuta sunt, præsertim Anno Salutis, M. DC. III. qui annus Iubilei in Polonia fuit, sub Clemente Papa VIII. dum in restauratione sepulchri, quod vetustate collabi videbatur, quæsitum esset de loco, in quo sacrum pignus quiesceret, continuo vno & altero latere, è pavimento eruto, & amoto, resplenduit conditorium, suauissimum & fragrantissimum odorem spirans, cum varijs editis miraculis. Sed hæc & reliqua, quæ etiã post edictum promulgatum DD. Commissariorum, vt potestate sibi delegata, ab Illustrissimo & Reuerendissimo Domino Martino Szyszkowski Episcopo Cracouiensi, honoris Diuorum suæ gentis tutelarium cupientissimo, diligenti examine in vitam, & miracula eius inspicerent: post hoc inquam Commissionis edictum promulgatum, quæ etiam his diebus admiranda facta diuina  
poten-


potentia, operata fuerit, si Deus votis nostris annuerit, publica faciemus. Quod ut nobis benignè concedat, in hac supplicatione quam ad tumulum Diuini Viri, Deo offerimus, ut eum quod vnicè cupimus, iudicio Ecclesię, Beatorum Ordini, associare velit, examinis feliciter expedito negotio, ardentissimis precibus efflagitemus.

Exultent Sancti tui Domine in gloria tua, lætentur in cubilibus suis, Psal. 149. Et Benedictum sit nomen Maiestatis tuę in æternum. Psal. 71.




CRACOVIAE,

*Impensis Nouodvorskianis.*







1857

3566  
4



